

淵雅堂全集

陽甫未定藁卷十

長洲王芑孫念豐

碑銘

吳縣學增置禮器之碑代縣令唐君

巡撫侍郎岳起公來治之明年用事于

先師詣蘇州府學陳禮器觀之誼考闕疑辨章品物完  
舊作新精稽其數躬率吏諸生歲時講肄舉凡登降之  
節舞詠之儀有其弗獨弗虔弗麗典法者莫不參會昔  
聞折諸

今制于是蘇州府學禮器粲然爲天下最惟吳縣隸治

尤近被化爲先縣之耆老子弟觀聽奔走充衢塞巷咨  
齋慕仰獲所未覩逢掖之徒傳相演習克敏且嫻仲冕  
吏于茲朝夕服公之訓又嘉縣人之能習于禮也遂以  
行之縣學爰偕博士先生出縣學故所有禮器樂器庀  
治繕增補前未備仲冕獨俸爲倡而縣人亦咸率其私  
錢鼓鐘管磬簋簠綴兆之物尊彝鼎洗椀楸繅藉之器  
次第以理奉幣之士贊禮之童斂工舞師各事其事旣  
飭旣具又明年中春月朔逢丁仲冕與師儒子弟祇將  
歲事誓誠肅翼音淳滌絜唱拜進趨有翼其序樂成美  
之在茲顧風勸之所自相與誦言非公何以及是雖然

猶願垂公澤于將來俾後有承以永無斲廼簿列其凡  
書之于石

華亭縣海塘天后廟碑代縣令作

國家泰平百五十餘年河海晏清神人說熹薦道功德  
崇報幽明以貢航市舶之譯交于海上鹽萊木棉之饒  
極乎海陬于是議增典祀創古未有而天后之廟徧天  
下海塘莫大于浙江其隸江南者東起寶山迤邐以屬  
于浙之嘉興而華亭獨當其衝自戚家墩至于陸鶴墩  
縣亘數十里海中金山玉屏諸峰對峙雲濤煙靄中風  
水相戰歎薄轟虺箭激輪轉雲驅雷怒鼉扑鯨呿與隄  
相直於江南最爲險處雍正中故海防同知俞公增築  
石塘七千一百二十餘丈環以外壩率埭瓊瓏鱗差合

沓複壁重門臥虹偃月故華亭之塘內外有二工亦最  
重於地爲最險于工爲最重凡所以効皇周浹而謹其  
阿護者宜無弗至而天后之廟祀宜尤虔塘故有廟不  
知建自何時乾隆某年某來爲縣歲時莅工謁拜廟下  
殿宇侈剝丹粉暗敝牲饗不竭不稱嚴祀某與縣人俛  
仰歎嗟諷議重修今

皇帝建元之明年隄有大工賴天后之靈旣鞏旣固猶  
始撤故廟而新之擴其堂廡閱其閉閣翼以廊舍經其  
漏庖有嚴有翼奠焉具舉某敬惟天后之靈蠶式昭海  
寓答况響轅見諸內外章疏者前後非一我

國家褒隆純嘏累加徽號雲書龍篆光懸日月華亭雖  
小縣瀕臨天墟爲民迓福因是崇節吉涓舉湮起墜不  
獨因人心以沛神社其于

朝廷之德意禮亦宜之某以非材量移茲縣今得藉手  
縣人告成事于廟以無獲戾皆縣人好義有以助成之  
不可以不記爰列輸金者姓名于陰以告嗣役者無忘  
焉

奉賢縣城隍神廟碑

奉賢縣城隍神者故松江府知府邱贈太僕寺少卿周侯廟也侯諱中鉉字子振浙江山陰人康熙中起家爲崇明縣丞累權六合宜興上海諸縣事咸有惠政後九年遷知華亭縣民有被誣殺人久繫侯立出之而論坐其實殺人者提督標兵張某芘盜前莫敢問侯至捕治伏法威愛信一時後三年秋霍海水大上漂數縣侯具衣糗屋廬材樁救卹其民又爲請賑弛租所全活甚衆明年以催科不及格罷縣民無萬數遮言上官聞於朝以侯還縣於是高安朱公方以左都御史莅修海塘



一以事付侯塘成侯以母憂當去民復額留而

世宗憲皇帝先已擢侯知府及是予假治喪還視府事  
明年 朝議濬淞婁諸水當事者非侯莫任以侯攝太

倉州董其役侯方築堰淞江堰一再潰晝夜凌險指麾  
倉卒覆其舟侯亡而築合是爲雍正六年之三月二十  
九日侯時年四十九事聞 賜祭葬贈蔭如制奉賢之  
爲縣析自華亭當侯爲知縣時奉賢猶隸境內其始掘  
又適當侯爲知府故彌久而民思其澤奉侯爲城隍之  
神歲時祈報孔虔勿懈比者縣大夫鄉先生相與作新  
神宇以其事來言請文於石芑孫謹案城隍神於今爲

典祀侯有功德於民勤事而死又應古法義不敢辭迺  
爲迎饗送神之辭遺其縣人畀歌以樂侯云辭曰  
侯之降兮乘雲颯迴殿兮雨續紛愴弭節兮顧我民  
旣壽兮物旣蕃稻登場兮鹽納垣侯之來兮入廟安以  
侑兮欵其笑殫簋饌兮炳燭燎棉有紡兮鱸有釣戶省  
開兮境無盜侯之行兮夷猶樂匏篴兮醉清謳醉揚靈  
兮橫桂舟朝潮逝兮夜潮留海不歎兮歲有秋

闕里石刻禮記大學中庸之碑代

巡撫澗江阮侍郎以國子生金匱錢泳所作隸古書論語孝經刻石樹之闕里于是某方轉運揚州美其事因復刻泳所書禮記大學中庸二篇以往樹焉而爲之記曰朱以來儒者析大學中庸于禮記之中別爲章句專行民自生齒以上辟叫就塾莫不循誦以古帝王齊家治國平天下之旨爲學童諷書以濂洛關閩之言爲諸生家法繇是道學儒林分繫史傳而不可復合者五百有餘年我

國家稽古同天欽崇典冊惇誨藝林旣法後王用四書

文取士而凡漢唐先訓載之十三經注疏者悉與頒布  
學官俾承學之士獲聞古義廼者

詔立石經于太學彝倫堂依唐開成故事校定其文程  
式一世繇是海內英流解去發灑奮生頭角人人著書  
鉤尋湮墜爭譚漢學懿乎哉經正則庶民興斯文與  
國運俱昌其將在此某竊以道不變而學所從入之方  
隨人有異自七十子不能同其隨人而異者自必因時  
有尙商質周文聖非齊軌而殊塗同會矧從千百年後  
追述千百年以前聖人之遺言而爲之訓發耶學者之  
于傳注爲漢爲宋與世推移而要以經文爲本經文則

其不可得與民變革者也大學中庸出于曾子子思其  
言尤粹其于孔氏之傳尤爲親切今大學石經循用禮  
記舊文而泳復以隸古書之有東京蔡邕氏之遺風焉  
謂宜列論語孝經之後樹之闕里予以具先聖先師授  
受源流予以彰示

朝廷開牖後生教懸多術兼存漢宋之義事應典法未  
容得已時嘉慶七年龍集某甲子某月日

清故光祿大夫 經筵講官兵部尚書致仕彭公

神道碑銘

乾隆四十九年六月既望致仕經筵講官兵部尚書彭公卒于家諸孤紹觀紹升等以其年十二月既望葬公吳縣穹窿山冠子嶺下公諱啓豐字翰文其始出江西之清江自明洪武中始遷蘇州爲長洲縣人世有休問公祖侍講公諱定求以篤行大儒顯名康熙中蘇州之彭遂稱天下公年十六補諸生雍正五年繼侍講公中會試第一廷對復第一朝野夸榮公怡然若未始有者

憲皇帝以公入南書房充日講起居注官遷左中允

恩數常與大臣等乾隆三年今

上嘉公有文擢公侍講累遷左僉都御史提督浙江學政積三遷至刑部侍郎領學政如故還丁父憂憂除補吏部再督浙江學政就改兵部官滿還乞終母養母終踰年起公署吏部右侍郎明年補左侍郎遂遷左都御史二十八年以公爲兵部尙書充經筵講官越四年左調復爲兵部右侍郎又二年致仕歸歸九年

上東巡公朝行在復故階先後立朝垂四十年八國家有試士之典未嘗不在列文學之任當時莫比其卒也年八十四公少及事侍講公受儒家言孝友祥順既

貴謙謙有子弟之容其在官大抵以謹慎見稱不好激  
言崎行而亦介然時有所不可爲僉都御史典試江西  
還過江南之宿州宿方被水有司賑不以時饑民號訴  
滿道上公立奏入時學臣有諂事大吏以屬官門生自  
居者公又疏言之皆見施行督學浙江還言利病四事  
其一曰餘杭南湖之水發源天目注苕溪下灌杭嘉湖  
三府今淤塞侵占者多古稱西湖之水溉田萬頃今淺  
狹不稱舊聞會稽上虞慈溪諸水利多不修復旱潦無  
備非宜其二曰浙省收漕每石私加五六升及一丁守  
不等宜禁其一曰浙省官水陸往來非奉使馳驛者皆



例外自發驛傳多者役及于夫少亦不下六七百人騷擾實甚宜與限制其一曰溫台諸府產鹽地例設巡鹽兵兵利賞輒案戶搜索或將數家食鹽并少報多誣民私販大不便章下所司議頗施行如所請其後二十餘年浙中督撫相繼得罪死州縣漕弊亦雜發益熟爛不可問其所以使然者漸矣公可謂識事幾者歟某侍郎者習於公因戲詆公眾中已而事聞於

上召問公公曰無之坐爲同官隱過不實奏失尙書其生平坦濶得過失不自知多類此在翰林久所奏進文字多切於治體後當有論其世而知之者詩古文集二

十餘卷具有家法其碑版文尤推重於世公既老壽家居十餘年掌紫陽書院典起後進如其爲學政主考官時不懈所居十泉街仍世通華子孫皆列官內外而門館蕭閒簾閣據几一燈諷卷如老諸生歲時伏臘婚嫁徭役糧稅如平人家芑孫及公門最晚以文字辱公知愛又從公子紹升遊得悉公服官制行始末及公葬紹升爲書授古義屬銘公墓道之碑固辭不獲謹按公生平遭際之盛載於里巷婦孺之口其清望著於士大夫之列獨其忠言亮節或有不得而聞者矣爲刪取行狀鑿其事言之有效於世者序而銘之銘曰

於休我公儒行是崇有蔚其華益大其家

憲皇庸之芝出告時躋公顯地惟今

皇帝清步如鶴翔我廟堂綽然進退心享用光權路爭  
趨公不欲居不欲而居處以虛徐人所碌碌公獨嶽嶽  
當其嶽嶽疾雷在腹

帝實右公公不自榮天實篤公公不自盈吉孚乃惠納  
約於誠惟惠惟誠以有休祐神之聽之則茂爾後嗟爾  
後人尚服厥舊穹窿之側卜公安宅螭首龜趺有穹斯  
石刻我銘辭風霜不蝕

資政大夫予告光祿寺卿伊公神道碑銘

今上親政之年以寧化伊秉綬知廣東惠州府秉綬御其父光祿卿公以往後三年其民陳亞本陳爛屐四作亂秉綬既擒亞本先事請誅爛屐四忤大府劾戍邊方是時粵兵之從賊者或爲僞前鋒僞三大王諸臣諱莫敢言光祿卿公自以嘗爲九卿義不得苟止具疏欲以聞大府并劾公褫職聽勘于是亂益劇大府倉猝自裁勘者奏公言皆實秉綬故無罪

上旣褒雪其事起秉綬知江南揚州府公復就養來江南以卒秉綬奉喪歸葬貽書芭孫屬文其神道之碑芭

孫辱與兼綬交又繁知公質行乃次公生平出處志節而爲之書曰公諱朝棟先名恒瓚字用侯伊氏唐末有諱顯者自莘城遷閩世爲寧化人傳廿一世入我朝某以歲貢生官順昌縣訓導不污耿逆僞命是爲公曾祖以公贈奉政大夫祖某贈朝議大夫父某縣學生贈如公階妣主雷俱贈夫人公年十八入縣學明年食餼乾隆十八年充拔貢生又六年舉于鄉又十年以陳初哲榜進士入刑部補安徽司主事歷河南司員外郎湖廣司郎中遷浙江道監察御史掌其事轉戶科給事中浮陟光祿寺少卿通政司叅議鴻臚寺卿大理寺少卿

最後爲光祿寺卿得疾海淀直廬請告凡十有五年以  
嘉慶十二年八月六日考終年七十九配羅氏封夫人  
子二長卽秉綬次秉徽監生孫四紹祖紹熾皆從九品  
紹曾紹籛孫女二公少澁靜抄耆好日讀其大父所篋  
藏書敏于文家貧時出講授性耿介歲飢食粥或欲周  
之而勿能也故左副都御史雷公鉉家居一見以爲可  
與言學其鄉試見知故光祿卿嘉定王公鳴盛在刑部  
見知諸城劉文正公公自聞雷公之學益究心儒先書  
言動有槩獲先後居喪一用朱子家禮茹蔬三年哀感  
行路同鄉蔡文恭公來弔退而歎曰癯人不乏雅材

子居貧實樂居喪實憂吾見伊君矣方會試旁皇詣廩  
適族子有以事繫縣者持白金詣公求一言公不可已  
而事聞于縣縣令雅重公竟釋族子公亦竟不受金居  
郎舍二十年敝車羸馬盤桓人後獨坐曹無寒暑在火  
先政有得失昌言輩中言之不得必爭爭之司不勝則  
爭之堂終不勝歸而焚香讀書以平其氣自主事遷御  
史皆用積資自給事中以至爲卿皆特擢不由論薦公  
素寡言嘗謂爲儒自不妄言始尤善處貧嘗曰安貧樂  
道人所恒言道果奚在恬退則道有其象焉謙和則道  
有其所焉斯固可樂耳蓋公所親受雷公以溯其鄉先

生蔡文勤李文貞之流風而身踐之者如此著有南窗  
叢記並詩文集若干卷藏于家其立朝無援雖嘗被遇  
高宗不居要路晚以秉綬官中事爲

國一奮天下覩公丰采及公卒而閩學之傳或幾乎息  
矣此于今世非一身一家之痛也秉綬服公之教又能  
承公志而大其施故具著所繇且爲銘曰

閩學自宋傳緒有從其在于近蔡公雷公公最晚出勵  
志禔躬載出載處心亨道盡往蹇來譽契于

高宗嘉汝小心

召對從容公老江湖痛抱遺弓寸旬素食慟此遭逢有



孤其操有耿其衷譽以靡悔亦克有終歸就考卜有碑  
斯寫子孫繩繩來者方隆顯銘詔後遺直是恫孰來下  
馬欽想餘風

長洲王世孫念豐

墓表

誥授朝議大夫同知議敘加一級莊君墓表

君姓莊氏諱四得字思謙先世由汴梁扈宋南渡散居  
吳楚其遷華亭之白沙鄉則自諱伯成始伯成以下蕃  
衍數千指雄其鄉遂以氏氏其地曰莊鎮十二傳至諱  
恭又徙南橋南橋析隸奉賢故今爲其縣人恭生贈朝  
議大夫萬甸萬甸三子其長曰肇龍國子生充鄉飲大  
賓以乾隆二十年薨賸功

朝制追贈生簿卽君之考

也妣張繼妣胡所生妣徐俱贈恭人君九歲喪徐恭人  
十八喪贈公知哀盡禮有兄而殤遂自子立持門戶脩  
其先世餘業益起饒大然一用以資行義性樸儉敦倫  
飭紀不事表襮所交必正人篤嗜文史治家之暇終日  
手一編子几堪輿岐黃諸子百家之書莫不具覽援例  
入監賞階府同知加一級縣自析置未建學官先贈公  
與縣中好義者相與共作之及君之身一再修葺克繼  
其志乾隆四十九年拯災有勞今刑部侍郎許公兆椿  
方守郡親作書以獎異之君內行淳備善事其繼母胡  
又刻行其民母張恭人遺詩女兄弟四人歸廖氏者早

寡經紀終始有恩義分建宗祠于南橋。今上建元之  
七年蠲田千畝爲義莊贍族。大吏以聞得旨下部  
議敘加一級。其他祠廟書院橋梁寺觀諸善舉不勝書  
最其大者如此。配程氏贈甘肅蘭州府同知士徵女先  
卒君爲卜地于縣之橫涇東原并自營生壙及是其孤  
程鵠等卜以君卒後三年十一月八日就窆介所親來  
求表其墓。余前官華亭未及識君聞君之風義舊矣。旣  
又得所爲義莊條例慨然想見其爲人因爲序其事而  
銘之。君卒在嘉慶十二年九月二日年六十四子男十  
一人程鵬拔貢生以直隸州州判試用河南署汝州州

同程鵬虞貢生待選訓導皆前及程鵠從九品程鵠殤  
程鷺按察照磨程鷺程鳳皆主簿程鵠殤程鴻程鵠程  
鵠女一適嘉善張家炳孫男六曾培承君之重以布政  
司理問試用直隸借補晉州州判曾樹曾圻曾善曾慶  
曾杰曾孫一銑銘曰

義莊非古宋始云元明迄今遞相因士有慕之遺軌遵  
或不旋踵隨而湮惟吳范氏久益新當其始作同一勤  
興隙儵異存乎人久整一視人精神嗟君爲義勇絕倫  
十頃負郭闢揀均勿替引之須後昆尙嗣厥服壽厥親  
義莊勿墮君長存

贈朝議大夫國子監生王公墓表

敕贈文林郎晉贈朝議大夫國子監生王公卒三十六年孤申伯自其河南官所述公遺行以命其族子芑孫曰烏虜吾年十八而喪吾母先恭人又七年而先大夫奄棄以吾之弗德弗明從仕于時累更夷險及茲垂老幸得長子孫以無隕越非先人之教不及此而墓道無文何以示後願有圖于子芑孫未及接公惟申伯父子再世用才能自力以克有祿于

朝既以其階贈公發其潛耀猶欲托諸文詞以流懿于無窮義不得辭因爲表著大略凡其族出世系名諱有

見于芑孫前所爲公母弟嘉峪關巡檢之誌者不復書  
公諱某字某自號求古世居洞庭東山公童丕嗜學歷  
遊名師學成累試不售已遭父喪喟然曰讀書豈直爲  
功名功名又豈科第之謂耶遂一意杜門奉母篤志經  
訓不爲詩不喜佛老洞庭俗有喪者雜用僧尼公獨遵  
用朱子家禮其間里有化之者弟世錦卽所稱嘉峪關  
巡檢也少長于公遭家中落公不以家事關世錦使卒學  
所與同居從父昆弟衆多處之有序月朔必往拜父墓  
家忌素食終身父在嘗欲以所居園屋爲家祠未成公  
繼請于諸父卒爲之申伯五歲爲婢傷其指婢寤甚公

好言慰之作字端嚴類其爲人而與人欵篤其鄉人思  
之久而不忘云卒在乾隆某年月日年若干以申伯知  
中牟縣時 覃恩贈文林郎又以孫仲湘知山西吉州  
加二級晉贈朝議大夫配徐恭人歲貢生某女年十九  
歸公能贊公孝友撫長世錦歸以其妹歸胡氏姑早寡  
遇之有恩卒在乾隆三十年正月之朔年若干附公以  
葬子二長臨伯監生次卽申伯今官上南河同知孫某  
某官曾孫某某官系之銘曰

桑東兆吉翳古有聞公卜于是舊亦桑園我來山中公  
歸九原旣登公堂又拜公墳羣從兄弟昭穆以分公坎



其中長次是循草則宿矣澤有如新

天書載錫自其子孫克綏厥寵彌衍以蕃溯所繇至公  
德之淳淳者其心勤者其身我爲德銘風示山人

墓表

贈中憲大夫晉贈武翼都尉郭君墓表代法庶子

作

君諱鎮域字維城世爲山西介休縣人其始居縣之西鄙數傳而徙之西南及君始築室於朱潞國文公故里縣人謂之文家莊郭氏而郭始爲著姓祖同湖考玉興贈中憲大夫祖妣溫氏妣梁氏秦氏二宋氏並贈恭人後宋恭人又以節旌於

朝君三歲而孤七歲而學年十八棄書爲賈入貴授職縣丞卒年七十有七其卒以乾隆四十三年十二月十

四日其葬以乾隆五十九年四月十六日墓在縣之小  
暢邨以其配耐君始以子瑗貲階贈中憲大夫繼以孫  
淵植貲階晉贈武翼都尉其配九宋爲始室繼張若侯  
又繼高繼孟繼李繼溫繼武並先君卒最後復繼張氏  
後君六年卒皆贈淑人子三璋官湖廣蘄州衛守備先  
卒瑗職同知加二級珩職布政司理問加四級孫六淵  
植職游擊淵極充功臣館校錄議敘州同加六級淵梓  
職衛千總加一級淵楹國子監生文魁縣學生文林曾  
孫四翊京拱京翰京輔京女六皆適士族君旣少孤妣  
宋恭人賢有節行法度君服其教用能起窶艱中致富

既富而好行其德居恒舍藥物治橋梁歲荒則除其私租鄉人之貧不能昏與葬者往往賴其力以是一縣之人稱賢之其爲買不屑屑與他買逐利身自往來燕齊吳越之郊熟其民俗以時俯仰息常倍贏尤好卜筮言頗竒中然不以自矜子孫有請受其術不許乾隆三十五年

上方出師討金川山西爲兵所經由處君慨然曰吾儕小人其敢愛力乎卽日遣子璋詣縣自言以白金七千兩助軍烏虜今天下所稱富長者皆在山西世常謂山西人儉嗇然公私倉猝慷慨出財以紓事者往往於山

西人見之然則其所謂儉嗇乃獨在服食車馬之間又  
何害於爲義乎如郭君亦其一也宜可得表已於是爲  
銘以揭諸墓道銘曰

君之歿有遺言吾故居小暢邨水時至苦我人我則徙  
邱墓存邨父老吾弟昆值沮洳歲艱辛爲坊庸志未伸  
恭君命子若孫卒成役卜君墳長堤言言若蠶尾更千  
萬年不可圯新封隆隆壓堤趾孔固孔安從考妣歸于  
其居魂說喜邨人來觀拜不起讀我銘詩淚如水

湖廣蘄州衛守備贈武翼都尉郭君墓表代法庶

子作

予旣以介休郭生淵極請表其大父贈武翼都尉君之墓生復進而言曰今茲四月實舉吾父守備府君之喪從吾大父以葬於縣西南小暢邨之阡先生旣辱貺大父而與爲銘矣諸孤不肖不忍吾父之姓名久而湮墜敢繼以請再拜出其狀于是去守備君之卒十有六年矣諸孤以歲之不易力之未有間故卜吉也遲遲之又久而卒克葬君如禮又欲得一言以永君於後予雖不識君其於銘君有不宜得已者按狀君諱璋字廷儀其

世系在贈武翼都尉君之表君姿稟穎異少聞塾師講古書中兵事輒踴躍既長慨然欲就武試以自奮于功名父母禁之乃止然終不樂爲章句業壯而出遊齊魯燕趙閒無所遇會

王師下金川君以父命獻白金七千兩助縣官費事平敘績以君爲湖廣蘄州衛守備旣之官一月暴卒訃歸贈武翼都尉君聞之曰嘻吾固嘗卜此行之不吉也哭之慟未幾亦卒烏虜可哀也已君在時贈武翼都尉君旣以賈饒君處境順無所自見雖一試於蘄州不竟厥施行事無可紀者而其志常欲有效於時

國家設衛守備四十有四領於漕運總督其在所治不  
過職勾稽奉期約與文墨吏等然歲久遷去則皆爲將  
領君旣好武使天假之年少需擢用以紓其生平之所  
嘗自期者宜有可觀而遽已不待又可惜也君卒於乾  
隆四十三年閏六月初一日年五十一軍功加三級贈  
武翼都尉凡三娶溫氏梁氏贈淑人陳氏封淑人子四  
長淵植職游擊次卽淵極職州同次淵梓職衛千總次  
淵楹監生孫四女二孫女三淵極方繕書功臣館以君  
之弗歿于家而葬又遲也過時而哀予推其意表君墓  
道爲楚言以招之其辭曰



君乎歸來  
斬峰穹窿  
鼓角嶷嶷  
南有盤龍  
不如縣之田  
可以封些  
君乎歸來  
斬流澆滸  
幽蘭不芳  
惟泥之漉  
不如汾之曲  
可以濯些  
介山之崎  
嶇呂梁之  
盤紆泉甘  
土厚展也可  
娛君歸乎  
來懷爾故  
都些蠶勺  
兮羽觴像  
設兮君房  
紅壁沙版  
哀瑟幽簧  
君歸乎來  
饗我新堂  
些水歸其  
宅馬鬣是  
營石羊石  
馬琢雕崢  
嶸君歸乎  
來安此佳  
城些辰良  
日吉昭穆  
既次紙錢  
寓馬居人  
來穉君歸  
乎來利而  
後嗣些

欽節婦傅氏墓表

欽于姓最孤其在松江尤不蕃而世多節婦有欽氏子  
曰罕年者少聘傅氏女昏有日矣而罕年病辭之傅氏  
傅氏女矢死自請以身歸欽氏于是歸欽七日而寡蓋  
未成婦也欽故貧又罕年祖母在篤老傅氏女年始十  
入其里之人因欲還女于傅氏傅氏女不肯慷慨言曰  
未亡人之來死所預辦今夫亡而祖姑存是天哀祖姑  
而使未亡人奉其餘年也是天哀未亡人而使未亡人  
獲承夫之終事也卒請留事祖姑以待夫弟之有子日  
紡木棉花市米易薪扶養祖姑恭而有禮逾五年其夫

氏之黨將葬罕年傅氏女拊棺一慟遠絕旣蘇遂嘔血  
病日劇其年秋祖姑氏又死傅氏女曰烏序今而後吾  
其可死矣夫已而果死死三日面如生香氣滿室事在  
嘉慶三年正月于是罕年從叔父府學生欽善以狀聞  
于時而長洲王芑孫方爲華亭縣教諭來表其墓且爲  
之銘銘曰

是爲節婦傅氏之墓予職文學掌故于是是用書之以  
告于行路後有過之尙增其封樹

金節婦梅氏墓表

節婦梅氏江蘇華亭縣人年二十其父如惠以嫁同縣人金國樞逾年國樞卒無子無可嗣者氏還父家食貧二十六年完其節以歿歿後七年節婦之兄子華亭學生梅春魁以節婦之未旌于

朝也謁余有述遂書以表諸其墓我

國家敦崇陰教婦節限年爲斷凡以杜有司之意爲高下於法亦旣周矣然而承平久法令益積有司奉法不暇而所謂法者持之以胥吏于是胥吏有法以制有司有司無力以治胥吏凡夫忠孝節廉可喜之行之在於

民間其尤貧者未有能自列于有司者也雖其自列于有司而又有良有司者攘臂以出其間未有獲聞于朝廷者也以余之爲校官于是廼旣去官而表梅氏之墓也烏虜

唐太宜人墓表

善化唐君仲冕自江南吳縣知縣擢知海州直隸州入  
見

天子還過山東焚黃先宜人墓下歆榮祇悃悼思流懿  
以書命芑孫曰吾先大夫以乾隆六年舉人歷知平陰  
昌邑縣事有惠於東中吾先宜人之歿於平陰也適會  
調之昌邑旋罷貧無以歸于是相肥城之陶山以爲吉  
遂葬焉肥城故平陰旁縣先大夫風聲氣澤存焉陶山  
穴高嶮不易營兩縣之民相與奔走共作之于茲二十  
有九年矣惟仲冕之弗德弗明無所負荷惘念先大夫

後宜人二十年獲歿於鄉故與前宜人李皆葬善化之  
白田鋪而宜人之喪不克歸仲冕從仕東西南北幸得  
一日之間以來醜酒而墓道之石無文其何以詔遠願  
有圖于子芑孫與仲冕雅故哀其請不敢辭迺敘次其  
族出事行生卒男女之大凡爲之表而系銘焉宜人譚  
氏長沙人譚故茶陵右姓年二十五乃歸之唐府君諱  
某爲繼室入門視前子如其子視前兄弟子如其兄弟  
子先姑氏彭有禮法性嚴毅在側者常輕重不得獨宜  
宜人臨歿喟然謂曰汝異日當有賢子孫其從府君官  
中無寒暑紡績聲徹戶外或勸止之曰吾習業可以養

心均愛諸子不姑息諸子有愆爲此卜者立毀其具曰  
曷爲神仙汝乃不讀書而作劇耶其有識斷如此卒以  
乾隆三十五年十一月十八日年五十六葬以三十九  
年四月以夫階封孺人以仲冕官荆溪知縣時加三級  
晉今稱子三長家鬯國子生廸封知縣次卽仲冕以乾  
隆某年潘世恩榜成進士歷今官次佳駒從八品女一  
適訓導張雋思孫九直從九品常鈞縣學生常鑠常銳  
亮分發安徽從九品鑑訓導常鏌國子生錢鏐孫女六  
曾孫八銘曰

有穹其巔有坎其中有熾有符宜人之宮惟是陶山卜



之允吉大夫視窆縣人負粹憲憲大夫惠此縣民婉婉  
宜人壺彝是聞爰集其麻及於知州維廉維勤世德之  
求旣最而升入命

天子歆是

寵綏來告來祀大夫反葬齊楚相懸煙雲緜邈灑涕茲  
阡協諸經義先妣有祭異時守塚其祭亦世知州有子  
有承於是世載廉勤神其委祉伐石爲文以告東人讀  
是銘詩扞其樵薪

詹府君葬記

嘉慶四年冬十月丁未詹君應甲反葬其親例贈文林  
郎詹府君于祖籍婺源縣西郭之張邨塢以元配余孺  
人祔明年三月過華亭示芑孫以墓圖而告之曰以家  
之不造應甲之寡兄弟而役役于外東西南北之不可  
知也願有以爲之記芑孫弗敢辭詹氏爲婺源著姓業  
于製墨其墨行天下而府君尤能府君諱淳號古愚其  
少也侍大父父母醫藥能使忘其疾長而操業遊四方  
能辨識士大夫賢否與諸兄讓財撫其兄之子如己子  
又時時出所有以分贍族屬以故業勤名起而家無所

羸以乾隆某年卒年若干孺人出明南京某部尙書文  
莊之後有婦順先府君若干年卒年若干當應甲之生  
府君夢一客冠帶登堂以紅箋置几上若曰唐進士温  
岐怪之以語孺人孺人故不識温岐府君爲舉舊唐書  
所載庭筠軼事孺人不樂曰審如是有文無行何爲乎  
來哉以故應甲自墮地而督教之尤嚴府君三子長卽  
應甲以舉人檢選知縣貲階太常博士次啓甲早卒次  
振甲候選從九品應甲與芑孫遊二十年熟其家世行  
事又嘗得見府君懇懇信義人也應甲所爲墓圖盛述  
堪輿家以張邨山環水抱風氣廻合稱去聲爲德人之宮

若有前定烏虜其信然哉應甲自諸生獻賦

高宗純皇帝賜之文綺已而舉于鄉雖亦能文章頗工  
爲唐人小樂府仿佛如岐所傳而生平敦篤力行其進  
駸駸未有艾豈惟堪輿之說爲無足道卽府君之夢孺  
人之言自君子視之皆足以申誠應甲使之曰自顧省  
益進厥德以大其門閭而非必不祥之徵也故不刪其  
事而附著之亦因以勵應甲俾有所審慎于斯焉

石湖楞伽山墓碣

清故宣城教諭府君之墓

碣陽

府君姓王諱世琪字說巖吳縣人明大學士謚文恪  
鑿八世孫由蘇州府廩監生中乾隆丁卯順天鄉試  
舉人充內廷景山教習歷官安徽歙縣宣城縣教  
諭少以文名見稱於金壇王步青宜興儲大文淳安  
方彛如里中沈德潛其中鄉試故大學士諸城劉文  
正公爲主考其同考官故左都御史寶公光鼐也生  
平尤自力於學行奮然欲有所見於時迄不得志鬱  
鬱以卒其卒在乾隆三十八年之七月二十日年六

十七配吳氏先卒以府君既卒之明年合葬於此子  
一曰寅熙孫三曰芑孫翼孫桐孫

碣陰

清贈華亭教諭府君之墓

碣陽

府君姓王諱寅熙字秩東父宣城縣教諭世琪有文  
行府君以名父之子操刑名家言入大府幕數十年  
有名感激豪宕以意氣自子用次子翼孫官封呂堰  
驛巡檢以長子芑孫官封華亭縣教諭年六十八卒  
是爲嘉慶五年之閏四月二十三日後三年卜葬于  
是去宣城府君墓一里而近實相望也配繆氏封孺

人并營壽藏焉

碣陰

清故呂堰巡檢殉節王君之墓

碣陽

君姓王諱翼孫字以燕號聽夫長洲縣人由宗人府  
供事議敘歷官湖北興山縣典史呂堰驛巡檢嘉慶  
元年三月二十九日在呂堰遇教匪之亂罵賊不屈  
爲逆民俞宗武所殺棄之水中不得其屍事聞有

旨賜葬瘞其衣冠于此其生平行事及朝廷恩數

具詳錢塘袁枚吳錫麒青浦王昶陽湖洪亮吉高密  
王寧焯無錫秦瀛諸所作誌銘表傳配尤氏生一女

無子以兄子嘉福爲後世襲雲騎尉

碣陰

清故處士王君之墓

碣陽

君姓王諱桐孫字稭堅號約夫君少教于其父兄穎  
挺勉學善刻印之術有志奮起欲成一業以自名於  
後甫弱冠以試場得疾遽歿既歿而名挂有司之牘  
可悲也夫君既早亡未娶不立後葬之宣城府君墓

右 碣陰

鐵夫先生墨琴女史之壽藏 碣陽

先生不知何許人也其生平疏侘有氣嘗以文辭受  
知 高宗朝海內名公卿學士大夫無識不識稱之  
曰鐵夫先生試于時逾二十年卒未有知之者年垂  
五十將歸隱山中乃葬其先人及其前所娶妻徐氏



于是而作生壙焉墨琴者其後妻也亦以翰墨自間  
流傳遍天下後當有考不著姓氏云

碣陰

楊甫未定藁

楊甫未定藁卷十二

長洲王芑孫念豐

誌銘

嘉善縣學生袁君墓誌銘

君諱璉字惕三世爲浙江嘉善縣人其始自陶莊遷之東亭再遷趙田君趙田之袁也惟袁氏遠有代緒君九世祖顥顥生祥祥生仁仁生黃黃生儼當勝國時咸以學行有聞黃以萬歷進士歷官內外有政績世稱了凡先生儼亦天啟進士爲循吏仁所著春秋考誤貶蔡編二書 朝廷采擇入四庫全書儼子廩膳生祚雍是爲

君之高祖曾祖蘅康熙丁卯舉人祖天鯨父性睿縣學生妣陳繼妣沈君少而才敏年十二能文以乾隆二十一年試補縣學生督學者爲寧化雷公鉉頃之丁父憂自其父時與家奴有訟及是到官連六七年不解破其家乃棄家爲賈往來蘇州及浙江乍浦織嗇貿遷力其贏以自食積久之家以復饒君賈未嘗廢書挾一卷坐市中冥心默誦口指麾他事學轉遂於未爲賈時朋試輒高等獨不中於鄉試旣老猶矻矻自詭必得竟不中以諸生終其爲人敦樸力內行而意氣豁如務爲有用東南士人多不知耕君獨買田分湖之上築室種樹課

子弟爲耕農隙課之讀書其不耕者分遣行視買業所  
在罷還復讀往來相送代常曰士生今世不能自喫飯  
則必不能安其學當少年時以爲吾文士也職於文而  
已一旦失所據則以衣食亂其心志而敗行於倉猝者  
多矣君雖起孤貧與兄弟同財執其喪過時而哀無子  
以兄之子鑿爲嗣晚年作家塾教其羣子姓與戚屬之  
貧不能竟學者所成就甚衆居恒以嗇治家至於義所  
得爲趨之若鶩欲外氏有女兒無養迎之家優奉之族  
子某學於家塾幾成矣而驟天遂養其母終身一日遊  
杭之昭慶寺見寺僧守癡貌若有憂者問之曰吾擇一

地以葬父母而償翔力紬是以憂君瞿然曰子號爲出  
家人而能志於是不亦難哉遽出金趣地主書券以其  
券畀守癡歲荒出粟以糶於鄉斗減百錢其生平忠實  
可倚事率類此配史氏明處士鑑之後佐君艱難中以  
克有成而不獲其享先君十五年歿其年四十有三子  
一鑿也孫男二青縣學生荆孫女二曾孫一效曾其孤  
鑿卜以君卒之明年三月乙酉葬君嘉善縣魏塘南區  
了凡先生墓側青以書來速銘子與君交垂十年以氣  
誼相得知君爲詳乃考其世系次其行事之可見者著  
於篇而爲之銘銘曰

士貧求官士而賈賈而行義道何古嗟君見義勇於虎  
惟義之服以有似續而子而孫以莫不穀惟而鄉人而  
德之薰讀我銘詩來拜於墳

恩貢生候選教諭俞君墓誌銘

俞君諱英字薪傳其先有明戶部尙書溥者以賢良方正起家永樂中始自餘杭遷之無錫八傳而至國子監生考授州判永昇州判生奎文閣典籍鯉祥是爲君之祖若父雍正中析無錫置金匱君遂爲金匱縣人其少也寄籍順天補通州學生已而歸其縣以恩貢生待選教諭未及而卒年六十娶秦氏子男四長坊選拔貢生方試爲八旗教習次型次壇次垣壇先卒女一孫男三鈞鈺鋼君始以典籍公命從同縣進士吳熙受易學爲文章務自矯厲不同俗屢絀于鄉試而爲諸生之日久



所歷學臣有好古能識士者往往歎其才以是縣中子弟多師尊之事典籍夫婦無違禮家故貧而好周人急有通家子貸君錢久之以先世所貽名人書帖請償君謂然曰而先人之手澤存焉而庸以抵債乎竟還之而折其券以試入京師未嘗一謁貴要全椒吳鉞青田韓錫胙同時知金匱無錫縣事兩人者號爲有文皆高自標置顧獨與君相愛重君雖不得已時時以故謝卻之其後子坊爲他縣宰子授書館於縣君遂不肯至縣坊幼多疾君日督以宋儒性理諸書曰讀此則神安氣靜可勿藥也瀕歿飭妻子勿妄祈禱口誦孝經士庶人章及

伊訓終篇命坊曰士無窮達修身立行以此爲準烏虜  
君旣垂老弗得志而恟恟敦善行不息要之以死可謂  
君子矣子未嘗識君而遊於坊君卒坊以狀來叩頭求  
爲之傳予以君事行於文律不中爲傳乃爲銘焉須其  
葬而納諸墓君卒以乾隆五十七年正月某日葬以某  
年某月墓在某鄉某原銘曰  
學之矻矻而不信以屈行之脆脆而不亨以屯惟其如  
此後宜繁祉我銘匪誣君子有子

內務府司庫廣公墓誌銘

公諱廣順字熙若號秀峰蒙古正黃旗人其氏曰伍堯其先有代通者以

文皇帝時自察哈爾來歸後從入關隸內務府官參領三傳而至夢成官內管領夢成四子長郎中六格次某次監生烏達器次某六格有子五人長員外郎平安烏達器有子一人監生長安長安無子而員外有五子長曰和順次卽公公平安之子而出後長安者也公生四子長法式善乾隆四十五年進士選庶吉士今官國子監祭酒次會昌次恩昌皆先卒次壽昌今官筆帖式以

和順無子法式善復還爲和順後以續員外之祀故壽昌獨承公喪公生有異稟七歲始茹葷九歲詠雞冠花驚其長老十七歲補博士弟子員舉乾隆二十五年順天鄉試需次當得小京官以貧自告爲內務府都虞司筆帖式歲久當遷復以貧告借補御園織染局司庫卒于乾隆五十九年八月二十三歲享年六十一配趙氏封安人先公十年卒年五十三公性僥直聞人一善津津然喜見於色其有不善面數之以是見過於人亦以是稱長者人有急急之如已事追事已其人來謝忽又忘之生平不飲酒善啖好獨遊遊常之佛寺然不拜

佛不與佛之徒交一言自奉甚嚴僕媪必六十以上人  
晚司織染局其地在玉泉山有煙霞泉石竹樹之觀晝  
則散步陂陀夜則篝燈誦易聲琅琅然自謂於易有得  
雖厨婢走卒必告以陰陽消息人事因應之理其人或  
漫不省或倉卒不知所謂退而相訕笑他日公遇之復  
然其爲人坦中無機如此芑孫辱與祭酒相遊好當公  
之生未嘗得拜公及公歿祭酒以公事行求爲誌墓之  
文惟公之在內府也官不高無所著見而祭酒文章行  
義焯聞于世其居家孝友以類自非君子之子而能然  
乎祭酒自墮地出嗣育於其世母然事公謹生有致其

養歿有稱其哀今又體葬不以公卿銘公之墓而屬于  
芑孫是有取于古之不誣其親者乃敢不辭而爲之銘  
其葬以乾隆六十年八月十六日墓在順義縣水泉鄉  
西原銘曰

維公家世載絕載紹奚生不蕃有潛弗耀夸夫闔強恩  
怨豪芒公常渾然與人爲忘貪夫好積自投於劇公則  
恬然與我爲適如公斯厚克茂爾後卜宅孔安宜富且  
壽

封文林郎國子監生宋君墓誌銘

余先大父宋出也而于諸宋兄弟年差最長諸宋多從講學爲文辭芑孫不及見矣所及見者故太平通判君三子秉鈞殿傳太平通判君故與大父兄弟行又皆宦安徽還往密以故秉鈞殿傳三君從遊亦最親頃之殿傳早世而秉鈞獨持其家數十年及見其子簡成進士撫教殿傳諸孤次第成立芑孫自京師出爲華亭校官過家門君葛袍跣履見之相慰勞甚勤及是又歿而先大父門人在者蓋無幾矣于是簡以書來求銘君之墓不敢辭君諱經邦秉鈞其字江蘇某縣人國子監生以

子簡官

封文林郎宋于蘇州自明爲著姓入我

朝仕中外常數十人君考有元安徽太平府通判妣陸  
封安人祖勤業山西澤州府同知妣施贈宜人曾祖德  
受累贈至中憲大夫直隸分巡清河道妣周累贈恭人  
君年十餘歲見賞里中故某官周先生某以爲是子端  
慤不苟隨恐不諧世用然必以名德雅操大其門基君  
聞竊自喜也因益自勵爲學早起拂拭窗几寒暑手一  
編苦思面若非人旨趣旣獲高聲朗誦所坐席未嘗不  
正造次不作行草書度架數千卷數緝閱如未觸手其



爲人大畧如是旣試不售遭父喪又失其弟獨奉母陸  
安人居歲時率子姓奉觴拜慶喟然曰人子事親如白  
駒過隙此日不再來安能坐廢晨昏翔游仕宦哉久之  
竟絕意進取始通判之官君留家侍澤州同知君養尤  
慎其終事曰不可使吾父有一朝之悔以恨于終身居  
通判君喪集高行僧誦大悲懺七晝夜通判君見夢若  
平生云且見佛說者以爲佛不可知其卽君之誠孝所  
蘊結爲之云與弟殿傳相愛異常時共劇飲及弟歿偶  
醉輒慟哭因之斷酒宋貧者多停喪祖墓久之累累積  
數十族兒鎔爲安嶽巡道出俸千金舉之而君爲經畫

其凡役事間好醫歲大疫輒施藥貧者窮親薄戚具有  
常餼晚以書抵子簡官中未嘗及家事烏虛簡之所能  
述君者止于是余亦不得而瀝之也迹君生平雖無當  
世之用而有鄉前輩之流風衣冠還往門無雜賓入其  
家花藥翳如蒼頭樸謹不問阿知爲舊門先冑以余之  
久于外歸而見鄉人士君子行事或頗異曩時其于君  
之亡何能無慨然矣乃刪著簡所述而爲之銘君卒嘉  
慶三年十月廿一日年六十四配陸氏四川保寧知府  
錦之孫山西永寧知州灝之女能助君爲施先君四年  
卒年六十二子男四長卽簡乾隆五十五年石韞玉榜

進士雲南麗江縣知縣次銓元和學生先卒次宸錫候  
選主簿出爲從父某後次筠監生女一適監生顧耀宗  
孫男六翔鳳翼鳳翮鳳翥鳳翰鳳翔鳳孫女八簡等以  
今茲四年八月癸丑合葬君孺人于元和縣中三十一  
都官浦之原以子銓附銘曰

宋先得氏封殷墟漢宣平侯史見書隨宋渡南入姑胥  
元明累徙仍世居有喬者木高其間巍巍文恪甥于吾  
吾家有連始

國初世爲昏好葭有孳少瞻君貌黔且腴寢尋衰白悲  
影徂嗟君抱器非時需雖紉不紆慶其餘子孫繩繩各

爲儒茲墓吾銘知不誣

東城指揮曹君墓誌銘

君姓曹諱銳字又裴其先自徽州遷蘇州之木瀆爲富家至君奮欲以讀書自見試不偶去而以歙縣籍爲國子生試順天又不利乃入貲爲從九品補直隸深州吏目凡居其職十年君旣以試減產紬爲小官跪起大吏前滋不自得遂復傾貲求爲兵馬司指揮時母王太安人年八十餘矣奉以入京師補東城未一月丁太安人憂服除再補東城未幾左調貧不能歸旋卒是爲乾隆五十八年年六十二君少孤翹然自異執敏天得從里中故沈尙書德潛學詩太倉王愷學畫而於畫尤長有

所寫仿常至奪真鑒者莫辨也顧不肯爲贗以售生平  
紙筆之好最篤然一管經數年不易渝墨斷縑摩挲鄭  
重蓋纖嗇若此中歲客質郡王邸出從學士大夫游意  
氣甚盛一再爲吏精勤矯勵時欲自獻其角牙所至齟  
齬以訖晚暮闔門數百指徘徊輦下忽忽憂歎聞者悲  
之娶王氏封安人子二元勳監生炳縣學生女三貞秀  
適王芑孫枝秀適陳霖其一未字孫二孫女四始王安  
人從君喪以歸道歿元勳繼亾久不克葬今茲嘉慶八  
年某月某日炳舉王太安人暨君夫婦葬之吳縣橫塘  
之上而以元勳夫婦附焉君二女知書貞秀之在室也

擇而嫁之芑孫及是芑孫實紀其終事又爲銘諸其幽  
銘曰

有子讀書繼君之志有孫勝衣克昌厥嗣有女而文以  
克葬君奚隆不墜奚屈不伸銘以昭之後亦有聞

布政使司經歷借補江西進賢縣丞王公墓誌銘  
公姓王諱世鈞字禹載世爲吳縣洞庭山人其先有諱  
鑿者當從兄文恪公相明孝宗武宗時以高隱自名世  
謂之壑舟先生六傳而至公之祖顯蛟考奕組祖妣妣  
皆張氏贈封如制公生平力內行自念族繁家譜自明  
以來十世未修及今不葺後無可措手者乃棄產鳩資  
徧之旁郡縣蒐尋遺闕蒼萃成書族人子有隨母改適  
冒他姓者出橐中金贖還承祀以先世所遺壑舟園爲  
家祠里黨有急量力濟之平息爭訟醵錢以修所居石  
橋邨街路修祖塋碑碣之將圯者其世父遺妾有節行



爲請于有司而旌之其勤身勉義大都如此公旣少長  
湖山間訥言架步進趨樸愿踴踴衆中好讀宋諸老先  
生書亦好小學家言嘗比緝篆隸爲一書以正俗譌曰  
家塾須知集古喪葬禮及近儒著論之切于身心者爲  
一書以誡子孫曰晚壑纂訓中歲人貲爲布政使司經  
歷發江西歷署贛州府通判袁州府經歷久之借補進  
賢縣丞亦嘗權署其縣事爲棉衣以施獄囚新進賢城  
西佛寺置茶亭以憩行旅丞廨當山水處因作池館與  
其地文人學士相眺詠爲樂所至載先世手澤名人書  
畫自隨傲裘敝食如未官時年逾六十引疾歸徒步鄉

聞自爲終制闢所居園側桑地與羣從兄弟同爲壽藏  
曰俾後子孫易相守也年七十六卒是爲嘉慶七年九  
月某日娶劉氏封安人先卒年六十一子一濟伯直隸  
張家灣巡檢先卒女三適某某孫某某將以公卒之明  
年正月某日就窆某來速銘惟公悃愾不習爲吏當  
高宗皇帝時治理通華無可著見止足蚤退默修于家  
垂式後來老成可念芑孫自少小見公及是銘公之墓  
有不勝慙然者銘曰

花籬有墓木有喬苑爲鬼庭霜不凋歲陽在辛日元柩  
有蝨蝕之螟賊苗白楊蕭蕭空條公挾道士丹符燒

山魘遁逝蟲孽銷山人咸頌公功高我削不書實行褒  
昭示來者祛華囂

浙江鄞縣杖錫司巡檢王君墓誌銘

吾族人之居洞庭東山者于是十餘世矣逾遠而彌疎  
芑孫所嘗還往通殷勤得其生平出處大略者曰族叔  
父謙谷始芑孫與叔父相見年皆未三十意氣壯往相  
激發其後叔父出爲小官不相聞二十餘年最後家居  
一再來過芑孫于華亭病衰行步重遲履闕上下庭階  
脚踏踣酒酣以往追譚疇曩相悲也頃之竟卒卒後五  
年其孤仲漢等以葬期告且徵銘迺爲之誌曰君姓王  
諱伯益字心恒謙谷其自號也江蘇吳縣人爲明贈少  
傅大學士諱某十二世孫曾祖某 皇贈江西布政使

司經歷祖某 皇贈河南洛陽縣丞父世鏞贈如君官  
君生百日而遭父喪母嚴撫之以長以教以抵于成人  
君既早孤無兄弟父有遺業在虞山因遂棄書爲賈久  
之不自得奮然欲有見於時乾隆三十九年入貲爲從  
九品分發貴州以母老告改浙江補寧波府鄞縣杖錫  
司巡檢凡居其官十年以母憂歸遂不出君軒豁有氣  
概偉軀幹好客喜施不問家人生產宦歸傾其橐空如  
也性至孝迎母之官出告反面起居食飲衣裳廁牕必  
周謹僕隸有過當笞母止之雖盛怒必釋晚治喪葬竭  
其力其在浙歷署奉化縣典史海寧州赭山巡檢温州

府經歷山陰縣柯橋巡檢杭州府知事照磨鎮海縣穿  
山巡檢鄞縣典史四明驛丞所至見紀不以官小自沮  
鄞有育嬰堂前司事者隳不治知府以屬君爲之剔齋  
澄汰增設教條活嬰無算喟然曰 國家立法至善由  
奉行者匪其人遂覺良法皆裨政矣豈獨斯堂也哉其  
卒在嘉慶三年九月三十日年五十五配張氏出自富  
家實能勤儉以佐君爲吏先卒年五十二以今茲某年  
月日合葬于花隴池祖塋之左子四仲漢監生仲濤附  
監生仲浩仲潮女二適監生葉光璧附監生章寶凡孫  
男二希埰希堇女二銘曰

君昔自言爲吏有省寧紆勿蹙寧寬勿猛用雖不究其  
懷肫肫物與吹春歸宅于茲以施其後人

姚姬墓版文

乾隆四十九年秋吾友詹君應甲悼其姬姚磬之亾買地葬之吳閶門外桐涇之原而屬子爲銘子方北行未果爲南中士友多詹之義爭爲詩歌豔其事已而誌傳雜出不可止或撫其始末爲元人戲曲流唱寢廣益寢矢真越二年君亦北來子從塞垣還借試京兆追話疇曩念姬矜然以志節死而傳之者或過其情微子誰爲徵信者乃序其事爲銘以貽之銘曰

猗嗟磬少失母厥父存皤一叟賣爲伶價孔阜磬爲伶有可否教之淫悻而走肄以貞恭而受微有姿碩且厚



敏手藝冠儕偶絕有名白門柳雉班班自牝牡猗嗟伶  
磬心醜擇歸詹詹吾友詹始遊歲龍首我爲客擊銅斗  
磬維時輩佐酒羌目成吉士誘詹曰嗟吾其取磬矢之  
妾箕帚中齟齬有瘕狗大居奇隔豐蔀磬悲摧自擊拊  
赴長流杵投白絕而蘇事亦剖渡江迎一握手病無何  
載廣輶定情歌託鼓缶未入室不成婦乃其身則詹有  
詹乎葬詹乎守死明白吝无咎我爲辭義不苟庶無誣  
後可久磬之年十有九卒與葬日在酉蘇州人曰姚後

候選同知沈君墓誌銘

沈君諱恕字正如一字杞雲以嘉慶二年補松江府學生以捐輸例敘銓府同知未仕而卒其卒在十九年五月八日年若干以卒之明年某月日葬君所自卜某鄉某原配陸氏繼曹氏筮姚氏皆前葬子男若干某某某出爲兄後女若干所許適皆士族其世系別見余所爲君考奉政大夫君誌始余爲華亭校官見君挺出諸生中賞異之君亦暱就余其後余往來江淮及是家居君必歲過余余或渡泖必主君家觴酌淋漓商量身世情好垂三十年余旣累有寢門之慟海內從遊日亡日少

而君方壯盛意謂得藉君送老而君遽止于是悲夫君  
爲人英邁有幹局自喜文字之闢士有一藝過人雖寒  
賤傾心低首所不可意雖貴介輒奴視之居恒灑掃閉  
戶自精洗硯囊琴羅列法書名畫古錢舊印流連忘日  
繼之以醉入其室不五六人皆其鄉之才行尤高者餘  
人不得而至也以是見病於儕俗偶勝流迎門倒屣慳  
然歎洽蓋自君歿而四方圭夫夫之東遊者漠然無所  
嚮余所爲悲君而重惜之者也君故疏財揮霍殆盡忽  
忽不自聊益放於酒色余時以戒君君雖不能用猶頗  
憚余前歿一年余微覺君酒態非昔私以語同遊者而

憂之豈意不幸而吾言適中也夫君好藏書又好刻書  
所刻有未竟者其弟慈次第續成之其遺孤男女慈與  
諸弟分任昏嫁君雖早卒可以無憾顧生平雅尚不樂  
與悠悠者同盡亦嘗自諱欲附余以傳于後今其葬也  
余何忍不銘余豈能傳君者而君之志則可悲矣銘曰  
烏虜君有山澤之好而無其臞有膏粱之享而無其愚  
租書田券之弗視而殘碑斷碣之是娛橘入桑收之勿  
問而酒人墨客之與居旣不可乎一世獨殷勤以嚮余  
感生平之緒論願託壽于吾徒寫餘哀于幽版余後死  
其益孤

山東汶上縣知縣蔣君配金安人墓誌銘

山東泰安縣知縣常熟蔣君因培奉其母安人諱南還卜吉改葬其先君故汶上縣知縣諱瞻岵于其縣北鄉之燕阿新阡安人耐焉既請太子少保兵部尚書協辦大學士總督江南江西漢軍百齡公誌其先君之世繫官闕而以安人之銘來辱于余余以賤辭不獲謹按古之合葬不別誌今安人卒後汶上君垂三十年事有弗具于汶上君誌中者不宜無見乃刪著因培所述爲之誌曰安人姓金氏浙江山陰人河南考城主簿某女主簿卒于官無子有二女其長已適句容張氏安人十歲

與母吳流落不能歸年十七汶上君從其大父往來考  
城遂委禽焉汶上君方困甚昏未幾輒出而母吳亦卒  
安人搢拄門戶力喪葬其間炊烟不屬者數年初汶上  
君亦以少孤故從其大父爲遊大父以遊死藁葬濟寧  
安人遂居濟寧而汶上君復出有濟寧人奪其葬地安  
人從烈日中往曉以大義魁者感動勸其人他徙墓以  
不奪汶上起寤難中由小官積遷爲縣令祿入驟豐安  
人自奉不異居考城時獨喜施人人有昏葬助之無多  
寡及汶上卒官餽居其地之蘿莊歲早安人脫簪珥易  
米以食餓者時張氏姊已貧迎以來養之終身旣而因

培復由小官起歷知七縣安人於公事無所問惟以因培性卞急日夜訓之和緩間外鞭朴聲輒爲減餐蓋安人生平薄身厚志大率類是其卒以嘉慶十八年十二月十七日年七十有八葬在明年八月某日子三因培原培文側出女四孫成愚成衆罕凡曾孫勝吾銘曰余之讖因培也安人方在蘿莊時因培年少頗跌宕自喜于文章每試京師歸輒罄其齋裝卒能勵之有立由冗散以薦進乎循良安人汔小康矣則又不有其享宜因培之迷德而傍徨託信辭以刊石詔而後兮無忘